

इवनिंग डोगरी न्यूज़ बुलेटिन

समे .18:15 Hrs

Headlines

- केंद्री रक्षा मंत्री होरें पाकिस्तान गी सरक्रीक च कुसा बी दुस्साहस दा मुंह त्रोड़ परता देने दी चेतावनी दिती ऐ।
- देश च अज्ज बुराई पर अच्छाई दा प्रतीक विजयदशमी दा त्यौहार धार्मिक श्रद्धा कन्नै मनाया जा'रदा ऐ। राष्ट्रपति ते प्रधानमंत्री होरें इस मौके पर लोकें गी मुबारकबाद दिती।
- उपराज्यपाल होरें लोकें गी स्वदेशी अपनाने ते आप सहायता समूहें आसेआ तैयार चीजें बस्तें दी खरीद उप्पर जोर पाया ऐ।
- पाकिस्तान दे नजैज कब्जे आहले जम्मू-कश्मीर (पी.ओ.जे.के) च हिंसक बरोध-प्रदर्शन जारी, 21 लोकें दी मौत दी खबर।
- जम्मू खिते च डेंगू दे मामलें च बाददा दर्ज कीता गेआ ऐ।

<><><><><><>

Rajnath

रक्षा मंत्री राजनाथ सिंह होरें अज्ज पाकिस्तान गी सख्त चेतावनी दिंदे होई आखेआ जे सरक्रीक क्षेत्र च कुसा बी दुस्साहस दा मुंह त्रोड़ परता दिता जाग। अज्ज भुज दे मिलीट्री स्टेशन च सशस्त्र पूजन मगरा सैनिकें गी संबोधित करदे होई उनें आखेआ जे आपरेशन सिंदूर दरान पाकिस्तान लेह शा लेइये सरक्रीक तगर भारत दी रक्षा प्रणाली गी कमजोर करने च नाकाम रेआ ऐ। परते च भारती सेना नै पाकिस्तान दी हवाई रक्षा प्रणाली दी पूरी चाल्ली पोल खोलिये दुनिया गी एह कड़ा

स्नेहा दिता जे भारत जदूं चाहे जित्थे चाहे पाकिस्तान गी भारी नुकसान पजाने दी समर्थ रखदा ऐ।

<><><><><><>

Vijay Dashmi

“विजयदशमी” यानि “दशहरे” दा त्योहार अज्ज समूलचे देसै च मनाया जा करदा ऐ। बुराई पर अच्छाई दी जित्त दा प्रतीक “दशहरे” नरातें ते दुर्गा पूजा दे समापन दा बी प्रतीक ऐ। एह त्योहार भगवान श्री राम दी रावण पर जित्त दे चेतें च मनाया जन्दा ऐ। राष्ट्रपति द्रौपदी मुर्मू ते प्रधानमंत्री नरेन्द्र मोदी होरें लोकें गी “दशहरे” दियां शुभकामना दितियां न। उपराज्यपाल मनोज सिन्हा ते मुखमंत्री उमर अब्दुल्ला होरें बी लोकें गी दशहरें दियां शुभकामनां दितियां न। उपराज्यपाल होरें अपने सनेह च गलाया जे “दशहरा” बुराई पर अच्छाई ते अधर्म पर धर्म दी जित्त दा प्रतीक ऐ। ए पवित्र ध्याड़ा असेंगी देसै दी एकता-अमन-रमानदारी ते तरक्की लेई कम्म करने ते आपसी भाईचारे ते एकता दी भावना गी मजबूत करने लेई प्रेरित करै। मुखमंत्री उमर अब्दुल्ला होरें बी “दशहरे” दे पवित्र मौके पर जम्मू-कश्मीर दे लोकें गी मबारकबाद दिती ऐ। उनें गलाया जे “दशहरा” लोकें गी हर चाली दे हालात च सच, धर्म ते न्यां दे मुल्लें गी बनाए रखने लेई प्रेरित करदा ऐ।

<><><><><><>

RSS

राष्ट्री स्वयंसेवक संघ-आरएसएस दे सरसंघचालक डॉ. मोहन भागवत होरें गलाया ऐ जे आत्मनिर्भर बनने ते वैश्विक एकता दे पक्षधर होने दे नाते असेंगी एह यकीनी बनाना होग जे

निर्भरता स्हाड़ी विवशता नेई ऐ ते अस अपनी इच्छानुसार कम्म करने च सक्षम आं। उनें आखेआ जे स्वदेशी ते सवावलम्बन दा कोई विकल्प नेई ऐ। उनें आखेआ जे कोई बी देश बक्ख बक्खरा होइये नेई रेई सकदा ते इस्सै लेई असेंगी अपने अंतरराष्ट्री ते बपारिक सरबंधें गी होर निग्गर बनाना लोइचदा ऐ। सब्बनें राष्ट्रें दे बश्कार परस्पर निर्भरता होनी लोइचदी ऐ। आरएसएस प्रमुख होर अज्ज नागपुर दे रेशमबाग च मुख परौहने साबका राष्ट्रपति रामनाथ कोविंद हुंदी मौजूदगी च आरएसएस दे 100 बरे पूरे होने ते विजयदशमी दे समारोह गी संबोधित करा रदे हे। डॉ. भागवत होरें आखेआ जे पहलगाम हमले मगरा कीती गेदी जवाबी कार्रवाई दी अवधि दरान असें देश दे नेतृत्व दी दृइता स्हाड़े सशस्त्र बलें दी वीरता ते युद्ध तत्परता ते समाज दे दृढ संकल्प ते एकता दे उत्साह भरोचे दे दृश्य दिक्खे।

<><><><><><>

Shashtra-Puja

राष्ट्री स्वयंसेवक संघ-आरएसएस आसेआ अज्ज कठुआ दे चंद्रशेखर आजाद सखा वार्ड नंबर 2 च विजयदशमी दा समारोहमनाया गेआ। बड़ी मती गिनतरी च स्वयंसेवकें इस कार्यक्रम च हिस्सा लैता। आरएसएस प्रचार अनुराग कश्यप होरें इस मौके आरएसएस आसेआ समाज दे उत्थान लेई कीते गेदे कम्मं पर लोs पाई ते आरएसएस दे 100 बरे दा सफर पूरी करी लैने उप्पर मुबारकबाद दिती। तोआई, उधमपुर दे शिवनगर दे सीनियर सिटीजन क्लब च बी सशस्त्र पूजा दा आयोजन कीता गेआ। इस मौके पर बोलदे होई उधमपुर नगर संघचालक कृष्ण नागर होरें आखेआ।

<><><><><><>

जे.ए.ए.एल नै बरोध प्रदर्शन ते हड़ताल दा आह्वान कीता जेड़ा अज्ज लगातार 4 रोज बी जारी रेआ। मुजफ्फराबाद च दकानां हट्टियां, शिड़कां ते इंटरनेट सेवां ठप पेदी ऐ। पीओके गी पाकिस्तान कन्नै जोड़ने आहले सब्बे रस्ते प्रदर्शनकारियें बंद करी दिते दे न। मकामी प्रशासन नै दसेआ ऐ जे झड़फ्फें दरान 172 पुलस अधिकारी ते 50 नागरिक घायल होई गए न। जे.ए.ए.एल नै कई मंगं पुट्टियां न जिंदे च शरणार्थियें लेई 12 विधानसभा सीटें दा उन्मूलन कोटा प्रणाली गी हटाना, मुफ्त ते इक समाज शिक्षा क्षेत्र, मुफ्त स्वास्थ्य सेवा, कनूनी कम्में च सुधार, अंतरराश्ट्री हवाई अड्डे दा निर्माण ते इये जनेह होर मुद्दे शामिल न।

<><><><><><>

Dengue

पिछले 15 दिनें च डेंगू दे मामलें च बाददा होआ ऐ ते जम्मू खेतर च सब्बनें शा मते मामले सामने आए न। इस बरे जम्मू क्षेत्र च 1 जहार 100 मामले सामने आए न, जेड़े पिछले बरे शा घट्ट न। सेहत अधिकारिणं दा आखना ऐ जे भारी बरखा ते पानी इकट्ठे होने करी मच्छरें दे पनपने दे हालात बने। जम्मू च जम्मू म्युनिसिपल कार्पोरेशन तरफा फागिंग ते दवाई दा छिड़काव कीता जारदा ऐ तां जे डेंगू, मलेरिया ते चिकनगुनिया जनेई बमारिणं गी फैलने थमां रोकेआ जाई सकै। कार्पोरेशन नै लोकें गी अपील कीती ऐ जे अपने आले-दोआले साफ-सफाई रखने च मदद करन, घरें च कुसा बी जगह पानी इकट्ठा नेई होन देन ते पीने आहले पानी गी खट्टिये रक्खन। लोकें गी मच्छरदानी इस्तेमाल करने ते पूरी बाहीं दे कपड़े पाने दी हिदायत कीती गई ऐ।

<><><><><><>

Gandhi Jayanti

अज्ज राष्ट्र राष्ट्रपित महात्मा गांधी होरेंगी उंदी 156मीं जयंती दे मौके श्रद्धांजलि देआ'रदे न। देश ते देश दे बाहरें भारती मिशन तरफा कई कार्जक्रम आयोजित कीते जा' रदे न। देश अपने साबका प्रधानमंत्री लाल बहादुर शास्त्री होरें गी उंदी जयंती पर चेता करा रदा ऐ। राष्ट्रपति द्रोपदी मुर्मू होरें राष्ट्रपिता होरें गी श्रद्धांजलि भेंट कीती। अपने स्नेह च उनें आखेआ जे एह ध्याड़ा राष्ट्रपिता हुंदे मूल्लें ते कदरें दे निमित्त ऐ। उनें शांति, बर्दाश्त करने ते सच्चाई दा स्नेहा दिता जेड़ा गै पूरी मानव जाति आस्तै प्रेरणा ऐ। प्रधानमंत्री नरेंद्र मोदी होरें बी राष्ट्रपिता महात्मा गांधी होरें गी श्रद्धांजलि भेंट कीती। प्रधानमंत्री होरें साबका प्रधानमंत्री लाह बहादुर शास्त्री होरें गी बी उंदी 121मीं जयंती पर श्रद्धांजलि दिती। जम्मू-कश्मीर दे उपराज्यपाल मनोज सिन्हा ते मुखमंत्री उमर अब्दुल्ला होरें बी महात्मा गांधी होरें गी श्रद्धांजलि भेंट कीती। महात्मा गांधी हुंदी जयंती दे मौके अज्ज पूरी दुनिया च अंतरराष्ट्री अहिंसा दिवस मनाया जारदा ऐ।

<><><><><><>